

MINORITY SHAREHOLDER WATCHDOG GROUP

BADAN PENGAWAS PEMEGANG SAHAM MINORITI BERHAD

(Incorporated in Malaysia – Company No. 524989-M)

Utusan Malaysia – 4 Julai, 2015 (C)

KWAP sedia RM100 juta

KUALA LUMPUR 3 Julai -Kumpulan Wang Persaraan (Diperbadankan) (KWAP) merancang menyalurkan RM100 juta untuk diuruskan oleh pengurus dana, tambahan kepada RM1.2 bilion yang kini diuruskan pengurus dana sedia ada.

Ketua Pegawai Eksekutifnya, Wan Kamaruzaman Wan Ahmad berkata, KWAP telah mengenal pasti pengurus dana dan kedua-dua pihak telah berbincang.

“Kami kini, lebih kurang, telah bersetuju mengenainya cuma ada beberapa kekangan operasi yang perlu diperbetulkan.

“Sebaik sahaja ia diselesaikan, dan jika lembaga pengarah meluluskannya, kami akan memberi suntikan RM100 juta, tambahan

kepada RM1.2 bilion,” katanya kepada pemberita di sini hari ini selepas mengumumkan penubuhan Majlis Pelabur Institusi Malaysia.

Mengenai aset luar negara, Wan Kamaruzaman berkata, KWAP akan memanfaatkan kelemahan ringgit dengan meningkatkan aktiviti perlindungan nilai untuk menyekat kenaikan pertukaran asingnya dan membawa semula pulangan kepada dana.

Aset luar negara tersebut termasuk pusat beli-belah Intu Uxbridge, serta bangunan pejabat 18 tingkat 88 Wood Street dan 10 Gresham Street di London, United Kingdom (UK).

“Kami memperoleh pendapatan berulang yang baik daripada aset-aset ini memandangkan se-

mua hartanah kami di UK mencatatkan hasil sewaan di atas enam peratus dan kami membawa balik pendapatan sewaan ini ke Malaysia mengikut tahunan,” katanya.

Sementara itu, majlis yang baru ditubuhkan berkenaan akan memainkan peranan penting dalam mewakili kepentingan bersama pelabur institusi di Malaysia dan bertindak sebagai platform untuk mempengaruhi lingkungan tadbir urus korporat yang lebih luas.

Wan Kamaruzaman dilantik sebagai pengerusi majlis itu, manakala Ketua Pegawai Eksekutif (CEO) Kumpulan Pemantau Pemegang Saham Minoriti, Rita Benoy Bushon, sebagai Ketua Sekretariat dan anggota majlis. - BERNAMA